

**Regional News Unit AIR Aizawl
Saturday, August 16, 2025**

Time – 07:30-0740Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- **Chief Minister Pu Lalduhoma'n Mizoramah kalphung thar hnuaiah Mizote chu eng hnam nge, tu thlahte nge tih official-a pawm tlak a awm theih nan 'Hnam Tobul Chhuichhuaktu' tur din a nih thu a sawi.**
- **Home Minister Pu K. Sapdangan nimin khan Lunglei DC Conference Hall-ah Lungleia sawrkar department hrang hrang hotute kawmin.**
- **Health Minister Pi Lalrinpuiin Siaha District Hospital-ah nimin khan Haemodialysis Centre a hawng.**
- **Nagaland Governor La Ganesan chu nimin tlai khan Chennai-ah a thi.**



DAY-CM

Chief Minister Pu Lalduhoma'n Mizoramah kalphung thar hnuaiah Mizote chu eng hnam nge, tu thlahte nge tih official-a pawm tlak a awm theih nan 'Hnam Tobul Chhuichhuaktu' tur din a nih thu a sawi.

Nimina India ramim zalenna ni vawi 79-na Aizawl Lammuala lawmna-ah Pu Lalduhoma chuan 'Kalphung Thar Mipui Sorkar' tih thupui hmangin "Kalphung thar" policy hnuaia hmalakna thar an neih te a sawi a. Eiruk leh hlemhletna chu sorkar hmalakna tithuanawptu ber a nih avangin, ngaih pawimawh hmasa-ah an nei nghal a. Corruption do dan thar an duan zingah CBI hnena General Consent pek te, mipuite'n sorkara an thil thlen te tikhawtlai a nih loh na'n Right to Public Services Act 2025 tlawhchhana subject tihpun te, Project tikhawtlai te, hnathawh chhiate a awm tawh loh nan a endiktu tur Project Monitoring Committee din a nih thu te a sawi.

Finna leh thiamna lo chhuak thar zel te chu ban phak tumim, technology thar hmangin mipuite tana a awlsam zawk nan Aizawl Civil Hospital-ah OPD Card online-a lak theihna tur e-OPD te, GPAY hmanga Electric Bill pek theihnte, ILP Online, Online Birth & Death Registration, Mipui Aw Portal leh a dangte kalpui an ni tawh a ti a. Artificial Intelligence pawh sorkar chuan a tul anga hman tangkai ve zel tumim hma a lak mek tih a sawi bawk.

Kawng chungchang pawh sawiin, kawngte a lo tlo zawk na'n, Paver khawl luh theihna chinah B.C system hman tan a ni a, kum tluana hna thawh a nih theih nan, kawngpui pawimawh chin te chu Rigid Pavement hmanga thawh phalna central-ah dil mek a ni a ti. Kawng siamna tikhawtlai thintu ber Forest Clearance chu state sorkarin a pek ve theihna turin, kawng pawimawh zawng zawng te chu National Strategic Importance-a puansak turin Prime Minister leh Defence Minister dil mek a ni a ti a. NHIDCL Managing Director nen Delhi-a an inhmuh tumin, Vairengte leh Sairang inkar Short Term Maintenance Contract hna atan cheng vbc 59.05 an sanction fel tawh thute, tunhma a kawngpuiin a paltlang, tuna a tlawh tak loh hmun 5 te chu kalkawng hlui maintain leh vek tura an ruahman thu te, NH – 302, Lunglei leh Tlabung inkar kawngpui chu NHIDCL kuta hlanin, Bangladesh ram thleng kawngpui thlur hnih a an siam tur thu a sawi bawk a ni.



I DAY: AWARDS

India ramin zalenna a hmuh Independence Day vawi 79-na, Mizorama Aizawl Lammuala nimina lawmna pui berah, Chief Minister Pu Lalduhoma chuan chawimawina leh lawmman chi hrang hrang a sem.

Chief Minister in chawimawina a hlan te chu **PRESIDENT'S POLICE MEDAL FOR DISTINGUISHED SERVICE (Republic Day, 2025):** Pu Zosangliana, MPS, **MEDAL FOR MERITORIOUS SERVICE (Republic Day, 2025)** Pu David Lalthangliana Hmar, Superintendent of Police, Kolasib DEF, Pu Joseph Lalremmawia, Asst. Commandant, 1st Bn. MAP, Pu Zoramsanga, Inspector, Mamit DEF leh Pu Vanlalhruaia, Driver Special Grade, Fire & Emergency Services te hnenah hlan a ni a, **GOVERNOR'S GOLD MEDAL :** Sub-Inspector (AB) K. Lalhmachhuana, 3rd Bn. MAP, Aizawl, constable Lalruatkima, 1st Bn. MAP, Aizawl, constable Lalchungnunga, 5th IR Bn., Aizawl leh Sub-Inspector Jason Lalrinchhana, Anti-Narcotic Squad, Commissionerate of Excise & Narcotics, Aizawl te hnenah hlan a ni a. **GOVERNOR'S SILVER MEDAL :** Sub-Inspector (M) Martha Lalthanpari, 1st Bn. MAP, Aizawl, Sub-Inspector Lalremsanga Sailo, Aizawl, DEF, Sub-Inspector Lalduhzuala, CID (SB), Aizawl, leh constable Ngurthanpuii, Anti-Narcotic Squad, Commissionerate of Excise & Narcotics, Aizawl te hnenah hlan a ni a.

CHIEF MINISTER AWARD FOR EXCELLENCE IN PUBLIC ADMINISTRATION chu Individual Category-ah Dr. Robert L. Khawlhring, H&FW Deptt. hnenah hlan a ni a, Team Category-ah Pu H. Lalengmawia, Pu NC Saravanan, Pu MZ Singson, Environment Forest & Climate Change Deptt. te hnena hlan a ni a. Mizoram Remote Sensing Application Centre (MIRSAC) pawh hlan a ni.

CHIEF MINISTER'S BANA KAIH INNOVATION CHALLENGE, 2025 : Higher Educational Institute Category for Hardware Innovation chu lawmman pakhatna dawngtu Pu B. Lalhruaitsuana, Higher Educational Institute Category for Software Innovation lawmman pakhatna dawngtu Pu Lalhlimeawma, Open Category for Hardware Innovation lawmman pakhatna dawngtu Pu H.V. Lalzuimawia leh Open Category for Software Innovation lawmman pakhatna dawngtu Pu Rodinpuia te hnenah pek a ni.

Zirtirtu tha chawimawina: STATE AWARDS TO TEACHERS, 2025 chu Govt. Primary School, Tarphe, Hnahthial District Headmaster, HC Vanlalhriata, Govt. M/S Chhingchhip, Serchhip District. Headmaster, R. Vanlalhluna, Govt. Ch. Chhunga H/S, Aizawl District Headmaster, Lalrinsangi Chawngthu, leh Mizoram Institute of Comprehensive Education (MICE) Principal, Lalrinkima te hnenah a hlan a ni bawka ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



HOME MINISTER

UD&PA leh DP&AR Minister Pu K. Sapdangan nimin khan Lunglei DC Conference Hall-ah Lungleia sawrkar department hrang hrang hotute kawmin, District hmasawna hna thawh hrang hrang a sawipui.

He hunah hian Lunglei HPC Vice Chairman Pu V. Malsawmtluanga, Lunglei West bialtu MLA Pu T. Lalhlimpuia, UD&PA Secretary Pu Lalmalsawma Pachuau, District Bawrhsap Pi Navneet Mann, DIG (Southern Range) Pu Altaf Ahmad Khan leh sawrkar official-te an tel a. Bawrhsap Pi Navneet Mann chuan Lunglei District-a hma lakna lian leh pawimawh zualte tar langin, department hrang hrang hotute'n an department kal tlanga hna thawh report leh Minister hnena thlen duh an neihte an sawi bawka.

Minister Pu K. Sapdanga chuan inkawm hona chu Lungleia sawrkar department te dinhmun, an mamawh leh harsatnate a hriatpui theih nana ruahman a nih thu sawiin, department hrang hrangte chu an hma zawnah District leh ram hmasawn nan theih tawp chhuah turin a chah a. ATL Road (Aizawl-Thenzawl-Lunglei kawng) siam that nana sawrkarin sum a dah hmangin hna thawh theih a nih veleh that taka thawk turin PWD hotute chu chahin, Lunglei khawpui tui lakna tihchangtlunna tura AMRUT 2.0 leh SASCI kal tlanga hma lakna pawh that taka thawh zawh thuai a nih a beisei thu a sawi a. Sawrkar hna thawk ruihtheihthil vang emaw, hrisel lohna vang emawa chhawr tlak loh awm chungchangah sawrkarin khauh taka hma lak zel a tum tih sawiin, pension pangngai emaw, special retirement scheme emaw hmanga chawlhthir an nih theih nan department hotute'n khauh taka hma la zel turin a chah a. Home Department hnuaiyah ruihhlo vanga buaina tiziaawm turin September thla atangin ramri atanga ruihhlo lo lut tipping tura beihpui thlak tum a nih thu sawiin, ruihhlo ngaite leh zuarte en zui kawngah pawh khauh zawka hma lak tum a nih thu a sawi.

Lunglei HPC Vice Chairman Pu V. Malsawmtluanga chuan HPC chu Lunglei District tan Planning department peng khat a nih angin, District hmasawna atana inpui a nih anga tha taka thawhpui turin department hotute a sawm a. Sawrkarin ram leh mipuite hmasawna atana ngaih pawimawh a neih leh a policy te tha taka kalpui thin turin a chah bawk.

<><><>

HEALTH MINISTER

Health Minister Pi Lalrinpuiin Siaha District Hospital-ah nimin khan Haemodialysis Centre a hawng a.

Hawna hun tawi District Hospital-a neih hi District Medical Superintendent (DMS) Dr C Lalrosanga chuan a kaihruai a, thusawiin Minister Pi Lalrinpuii chuan Mizoramah Dialysis mamawh thahnem tak an awm a, kal thalo enkawlina khawl pawimawh tak, Haemodialysis Unit hlawhtling taka bun a nih theih nana rilru leh ngaihtuahna sengtu, District Hospital-a thawktute chungah lawmthu a sawi a. Siaha district mipui zinga he khawl mamawhte tan malsawmna leh damna thlentu a nih ngei a beisei thu a sawi a, a thawktute chu damlote tan taksa leh rilru damna thlentu ni zel turin a chah bawk a ni.

Haemodialysis Centre a hawn zawh hian Minister chuan Khum-3 awmna District Hospital ICU a tlawh nghal a, ICU room mamawhte enfiah nghalin inthlahrung lova Hospital mamawhte a hnena thlen thin turin thawktute a chah bawk.

Haemodialysis Centre-a khawlte hi Indian Oil Cooperation Ltd leh Fairfax CSR sum atanga dawn a ni a, cheng nuai 15 man hu RO plant erawh National Health Mission atanga dawn a ni thung. Room chhung Plumbing, wiring leh thildangte chu NHM atanga dawn niin a chhunga khum 4 te chu DHME atanga dawn a ni thung a ni.

<><><>

NAGALAND GOVERNOR DIES

Nagaland Governor La Ganesan chu nimin tlai khan Chennai-ah a thi a. Kum 80 mi a ni.

,BJP hruaitu senior, La Ganesan hi February 2023 khan Nagaland Governor atan ruat a ni a, hemi hma hian Manipur Governor hna a chelh a, West Bengal-ah pawh hun rei vak lo additional charge a chelh tawh bawk a ni. Vawiin tlai dar 5:00 PM Chennai-ah vui a ni ang.

Prime Minister Narendra Modi chuan Nagaland Governor Thiru La Ganesan boral chu pawl a tih thu a sawi. Social media post-ah La Ganesan chu hnam hmangaihtu taima tak, rawngbawlina le hnam tana a nun hlantu anga hriatreng a nih tur thu a sawi.

Prime Minister chuan Tamil Nadu ram puma BJP tihpun tumin La Ganesan hian nasa takin a thawk tih a sawi a, Tamil culture pawh a ngaina hle tih a sawi. A chhungte leh a ngainatute tan heng thu te hi a sawi a ni.

<><><>